


Commemoracion di 150 aña di Abolicion di Slavitud dia prome di juli 2013 na Biblioteca Nacional Aruba

ORANJESTAD (AAN): Prome di juli 2013 reino henter lo para keto pa asina conmemora e di 150 aña di abolicion di slavitud. Riba 30 di september 1862 a publica e ley di abolicion cu Rey Willem III a firma, dunando asina na tur catibo libertad entrante 1 di juli 1863.

Cu esaki tambe a bin un fin na slavitud cu ta wordo sosteni dor di un estado. Despues di e rebelionnan di catibo den fin di siglo 18 a bin mas resistencia contra slavitud. Inglatera a aboli slavitud na aña 1833. Mientras cu negoshi di catibo a keda aboli na 1814, ta tarda casi 50 aña pa e catibonan den e colonianan Hulandes recobra nan libertad. Kiermen cu Hulanda tabata un di e paisnan cu mas a tarda pa aboli esaki.

Apesar cu hopi biaha nos ta pensa cu Aruba no a conoce slavitud, indudablemente esaki tabata e caso. Na momento di abolicion di slavitud nos poblacion tabata consisti di alredero di 20% cu tabata tin e status di esclavo. Nos por mira e influencia tambe di slavitud, den nos hendenan, den nos Papiamento, den nos cuminda, den nos musica y den nos cultura en general. Esaki nos por considera como nos herencia.

P'esey dialuna awor, riba 1 di juli 2013, Fundacion Amigonan



di Archivo, Fundacion Lanta Papiamento, Departamento di Cultura, Biblioteca Nacional y Archivo Nacional ta uni forza pa presenta un anochi informativo pa asina conhuntamente nos conmemora e hecho aki.

Lo haci presentacion: Rosa Arends MA: *Presentacion di manuscrito "Registro di Catibonan pa wordo libera na 1863."*

Ramon Todd Danderé Mag. Ling.: *Slavitud y Papiamento.* Dr. Luc Alofs: *Kind van de Rekeningen: Kinderen in slavernij op Aruba.*

Gregory Richardson MSc: *Slavery and identification on Aruba: the case of San Nicolas.*

Ademas lo tin actuacion di: Emerita Emerencia MA cu

un presentacion dramático y Gwendy Sneek cu un poema di Munye Oduber-Winklaar, regardando e tema di e anochi. Y tambe lo tin presentacion musical di Grupo di Tambu Sodo y Cuero y di Asociacion Coral Ars Nova.

E anochi aki ta wordo teni na Biblioteca Nacional, George Madurostraat y ta cuminsa pa 8 or di anochi.

E organisadornan di e anochi aki ta spera di por duna un aporte na conocimiento di nos historia y cultura por medio di e presentacion aki y alaves conscientisa nos comunidad di un fenomeno tristo, cu semper a y ta core manera un liña cora den historia di humanidad. Mientras cu den Caribe nos a conoce e fenomeno aki desde epoca Indjan, sigui pa esun colonial, mundo ya den e tempnan prome cu Cristo tabatin di haber cu e fenomeno aki, di konkista hende pa subordina nan como catibo na e potencia konkistador.

Mientras cu den nos mundo moderno e nacionnan ya no ta permiti ningun forma di esclavitud, ainda tin hopi cu ta sufi bou di loke nos ta yama esclavitud moderno. Djis pensa riba labor di mucha, trabou barata ("Cheap Labor") y trafico di hende muhe.